

La fin d'ina stagiun extraordinaria

180 curridras e curriders als campiunadis svizzers da cuorsa liunga a Sedrun

Hans Huonder/FMR

Culla concorrenza da sprint dils teams ein ils campiunadis svizzers da cuorsa liunga a Sedrun i a fin la dumengia. Ils organisaturs ein cuntents cun quels e Swiss Ski culla stagiun passada. Ils Grischuns ein semess bein en scena per la fin d'ina stagiun cumbinada cun grondas stentas pervia dil coronavirus. Alla partenza ei l'entira elita stada, sco *Dario Cologna* ni era *Nadine Fähndrich* e *Laurien van der Graaff*, il duo che ha gudignau argien al campiunadi mundial. Il punct culminont da quels campiunadis ei la victoria da Dario Cologna ella cuorsa da 50 km staus. Ina bilanza positiva dalla stagiun tila *Christian Flury*, il responsabel per la cuorsa liunga tier Swiss Ski. Las finamiras seigien vegnidas contonschidas.

Ils meglers ein semesirai aunc ina ga

Ina digna finiziun dalla stagiun da cuorsa liunga als campiunadis svizzers la fin d'jamna a Sedrun

Hans Huonder/FMR

Ton ils organisaturs dils campiunadis svizzers da cuorsa liunga dalla fin d'jamna a Sedrun sco era Swiss Ski han contonschiu las finamiras stagiunalas. Per la fin e d'excellentas relaziuns ein ils tetels naziunals vegni surdai. Denter ils campiuns ein era Grischuns. «Nus essan fetg cuntents cul decuors dils campiunadis, seigi l'emprema part il schaner sco ussa», di il president dil comite d'organisaziun *Guido Friberg*. El e siu team han danovamein giu en-tgins dis da lavur intensiva, mo sco ei para, ha il Club da skis Sedrun-Tujetsch buca difficultads da catter glied cun fiug e flomma per las pli differentas incaricas. Sco gia il schaner han quellas era pertuccau quella ga las restricziuns en connex cul coronavirus. «La disciplina dallas atletas e dils atlets mo era da tuts accumpignaders ei era stada quella ga fetg buna», di *Stefan Schwenke*, responsabels pils fatgs da Covid-19. Fertion che l'aura ei semussada il venderdis e la dumengia da sia pli biala vart, ei la sonda stada signada da cundiziuns meins bunas. Las relaziuns da cuorsa liunga sco talas ein denton stadas excellentas, gie per da quei temps excepziunalas. Co ei va vinavon cun concorrenzas nordicas naziunalas ni schizun internaziunalas en Val Tujetsch ei aunc scret ellas steilas. «Il mument havein nus negins eveniments pli gronds en mira. Ussa ha ei num trer flad e lu vesin nus vinavon», di Guido Friberg.

Cologna gudogna ils 50 km

Dapi onns s'audan curridras e curriders dil Grischun denter ils meglers Svizzers. Lur posiziuns han els era suttastrihau la fin dall'jamna a Sedrun e lur victorias ein lu era buca stadas grondas surpresas suenter las prestaziuns dalla stagiun d'unviern passada. Aschia ha

Dario Cologna dalla Val Müstair victorisau suveranamein la sonda ella cuorsa da 50 kilometers, aschidadir la concorrenza roiala da quels campiunadis. Per bunamein ina minuta ha el distanziau il secund meglier *Jason Rüesch* da Tavau. Ella categoria dils umens sut 20 onns ha igl indigen *Cla-Ursin Nufer* recaltgau la medaglia desiderada a quels campiunadis. El ha gudignau argien davos *Nicola Wigger*. Sil tierz rang sesanfla medemamein in Grischun, numnadamein igl Engiadines *Gianluca Walpen*. *Niclas Steiger* dil Club da skis Piz Ot Samedan ei daventaus campiun svizzer ella categoria sut 18 onns e *Marina Kälin* da S. Murezi ha acquistau la medaglia d'argien ella categoria damas sut 18/20 onns.

El sprint dil venderdis ha *Beda Klee* d'Ebnat-Kappel gudignau tiels umens, *Dario Cologna* ei daventaus tierz. Tiels umens sut 20 onns ha *Cla-Ursin Nufer* contonschiu il sisavel rang. *Niclas Steiger* dil Club da skis Piz Ot Samedan ei daventaus tierz ella categoria sut 18 onns. Tier las damas ha *Laurien van der Graaff* da Tavau victorisau, ferton che *Nadja Kälin* dil Club da skis Alpina S. Murezi ei daventada tiarza tier las damas sut 20 onns. *Marina Kälin*, medemamein da S. Murezi, ei daventada secunda tier las damas sut 18 onns davos la victura *Siri Wigger* dil Club da skis Am Bachtel che ha dominau trasatras ils campiunadis en quella categoria.

1000 tests

Sper l'entira elita svizra da cuorsa liunga, sco era rodund 40 curridras e curriders dalla Germania, ein era ils biars trenaders e reponsabels da Swiss Ski stai la fin d'jamna a Sedrun. Sper la bilanza dalla stagiun passada ein era gia ils emprems binaris pil proxim unviern vegni tschentai. Il schef dalla cuorsa liunga da Swiss Ski, *Christian Flury* da Tavau, ei satisfatgs dalla stagiun passada: «Igl ei stau in unviern fetg intensiv che ha pretendiu fetg gronda disciplina da tuts. Malgrad tut havein nus contonschiu las finamiras ton tier las damas sco tiels umens.» Il punct culminont seigi la medaglia d'argien da *Nadine Fähndrich* e *Laurien van der Graaff* als campiunadis mundials ad Oberstdorf stada. Leutier seigien vegnidas fetg bunas prestaziuns en concorrenzas da team e staffetta dils umens sco era differentas rangaziuns els emprems diesch da cuorsas dil Cup mundial. Cun success ein ils cadens da cuorsa liunga era vegni atras la pandemia: «Tut en tut havein nus fatg rodund 1000 tests. Pér ussa alla fin havein nus giu in cass. Quella situaziun ei stada cumbinada cun bia lavur supplementara.»

La basa sto cooperar

Swiss Ski dispona da fetg bunas structuradas. Tonaton sa era *Christian Flury*: «Il fundament per il sport da prestaziun vegn tschentaus ellas famiglias, ellas regiuns. Gest en ina tiara pintga sco la Svizra ei quei ina premissa.» Cun excepziun dallas tiaras tradiziunalas nordicas sco la Svezia, la Norvegia ni era la Russia, hagi la Svizra in diember fetg surveseivel da curridras e curriders che sappien concurrenzar sil pli ault nivel internaziunal: «Igl avegnir vegnin nus segiramein a stuer professionalisar aunc pli fetg la lavur ellas regiuns, semegliont sco ei vegn fetg tiel ballapei ni il hockey sin glatsch. Aunc sch'in trenader ha aschi grond plascher da sia lavur, sche sa el buca nutrir la famiglia cun ina piazza da rodund 30 pertschien.» Swiss Ski hagi aunc potenzial sin quei sector. Ponderar stoppien ins en quei connex era ina collaboraziun interregionala, vul dir ina megliera cooperaziun dallas regiuns per exempel el Grischun. Con fetg ch'il boom da cuorsa liunga dils davos onns attribueschi ad in svilup positiv seigi grev da dir: «Quei ei era puspei ina damonda locala. En em-prema lingia sto ei reussir als clubs d'animar ils affons da sededicar pli intensiv alla cuorsa liunga.» Tonaton ei *Christian Flury* optimists pils proxims onns: «Nus havein giuvnas curridras e curriders cun buns aspects e bia potenzial.»

Bronz pil duo Nufer/Schmid

El team-sprint han *Cla-Ursin Nufer* e *Fadri Schmid* dil CS Sedrun-Tujetsch contonschiu il tierz rang ella categoria sut 20 onns. Gudignau en quella ha Lischana Scuol cun *Isai* e *Noe Näff*. Ella categoria dils umens han ils guardiacunfins cun *Ueli Schnider* ed *Erwan Käser* victorisau e tier las damas han *Anja Weber* e *Siri Wigger* dil CS Am Bachtel gudignau. En quella categoria ha Tavau cun *Désirée Steiner* ed *Alina Meier* contonschiu il secund plaz, il CS Alpina S. Murezi cun *Marina* e *Nadja Kälin* il tierz.



Cla-Ursin Nufer (amiez) ha contonschiu il secund plaz ella cuorsa da 30 km dalla categoria sut 20 onns. Davontier il victur **Nicola Wigger**.



Christian Flury da Tavau ei schef dalla cuorsa liunga tier Swiss Ski.



180 curridras e curriders – da quei rodund 40 dalla Tiaratudestga – ein separticipai als campiadis svizzers a Sedrun.